

KARTA HEBREOWE'SX JÏI

Dxusa' kwe'sxtxi we'wek txajx Nçxi'ka's kaahçxa

1 ¹Dxusa' txãniitey kwe'sx yaçgawe'sxtxi maazkuëe uswa we'wek fxiyfxiychah txajx yuwee pta'sxsawe'sxtxi jxkaahçxa. ²Sa' açxh naa nmeh ensu' Dxusa' kwe'sxtxik we'we txajx Nçxi'ka's kaahçxa. Dxusa' txajx Nçxi'ka's jxkaahçxak naa kiwe kïjkïhnawa jxuka vxit. Txã'wë yüuçxak Dxusa' txãatxi's jxuka Nçxi'k kuseteçxaçxáa nvxiht. ³Txãa Nçxi'k ñik Ney zhiçxkwe zmeena' kweethnisa yu', sa' Dxus ma'wësate' le'çxkweçxáa yuhwa fxiysamée txãa ñiçxáak yu'. Sa' txãa ñiçxáa naa kiwe ma'k yuu nawa kïjkïhnawa jxuka ewçxáa kaafxi'ze'jna üsa' txajx we'weni yakhçxáa. Sa' txãa ñiçxáa kwe'sx pkaltxi yaateçxa Dxus pukate kaçxku cielute.

Dxus Nçxi'ka' angeleswe'sxte thaakwe walasa'

⁴Dxus Nçxi'ka' angeleswe'sxte thaakwek walasa yu', txãasak Ney üsni yase jxpa'ga maa angeleswe'sxtewa thaakwe walasa. ⁵Txã'wëte ñiçxáak Dxusa' bagaçxte yuhwa angeleswe'sxtxi' maa yuhtxwa na'jïna we'wemée:

Idxa' adx Nçxi'kgu,

Txãa pa'gath ñtxi yuuwa'ja's açxha' vxit jïme'.

Sa' txã'wëy maa angel yuhnawa na'wë we'weme':

Adxa' txajx Ney yu'nja,

Aça' txã' adx Nçxi'k yuuna jïme'.

⁶Nawa Dxusa' txajx Nçxi'ka's nyafxçxah naa kiwete nuykïhçxa', na'wëk we'we:

Dxus angeleswe'sx jxukaysa txã'sçxáana nwëese'jwa'j jï'phta' jïnak jxkaah.

⁷Sa' angeleswe'sx fxi'zewa'ja's yu' na'wëçxáak we'we:

Angeleswe'sxa' wejxa na'wë vxyaawa'jsa vxitnisata',

Sa' Dxus jxkaahnitx selpiina ipx beesa na'wë vxyaana yuuwa'jsa vxitnisata' jï'k.

⁸Nawa Nçxi'k fxi'zewa'ja's we'weçxa yu' na'jï'k:

Dxus, iidx jxkaahna üswa'ja' bagaçxtewa nes yuuna,

Idxa' ew yuuçxáa jxkaahna ũswa'jsag.

⁹ Sa' ewmeesa yu'sa' jxpa'gamée, ewsa yuuçxá'sgu pakwe.

Txáa pa'gak iidx Dxusa' iidx wēt fxi'zewa'ja's iiméh wala pees,

Naa kiwete iidx nwe'sxte jxthaakwe jī'k.

¹⁰ Vxite ajkhē' na'jī'k Dxus Nçxi'ka's we'weçxa':

Idxgu kiwe's pheu'j nyafxte,

Sa' cieluwa iidx kuseju vxitnisata'.

¹¹ Nawa txā'wēsa' pçuutxna, naapkaçxha' idxa' bagaçxtewa nes yuune'ga.

Kijkīhwa jxuka ropa na'wēçxáa iisxixna.

¹² Aça' jxuka yu'pthehni yuutxna.

Nawa idx yu' bagaçxtewa txā'wēsa nes yuune'ga.

Iidx itxi fxi'zeni' bagaçxte yuhwa pçumeena jī'k.

¹³ Nawa Dxusa' maa angeleswe'sx yuhtxwa txā'wē yu' na'jīna we'weme' bagaçxteçxáa yuhwa:

Adx pukate paçu ju'gte mkaaçx,

Idxna açesa maatxwa jxuka idxçxaçxáana nwēese'jwa'ja's vxitna jxā'phkaçx jīme'.

¹⁴ Jxukay angeleswe'sxa' kwe'sx na'wē kakwe jī'phmeesa naa

kiwete maaçxah ewte neeyūuwa'jsa ũstxna txāawe'sxtxi pu'çxya'

kaahnisaçxáata'.

Ewte neeyūuwa'ja's jxpa'yajkxmée yu' yuuwa'jme'

2 ¹ Txāa pa'ga wala jxpa'yakxwa'j jī'ptha'w, na'wē Dxus Nçxi'k yuu kwe'sxtxi we'wete yuwe ewsa's wēse'tha'w txāajū txuteeya'mée.

² Dxus yuwe's angeleswe'sxçxáa pta'sxni yuhwa ixiini yuumée kxteyku

yu. Txāa pa'gafiçxáatx nwēese'jmée pkalte wetesawe'sxa' kastigāyni

yu txāawe'sx āhmée yūupa'ga. ³ Txāaçxáa yuhwa kxteyku yuu, aça'

kwe'sx ewte neeyūuwa'j txakwe walasa's Dxus Nçxi'k Kristo txajx yuweju

yuuk pta'sx txā'sa' jxpa'yakxmeeçxa', çma'wē Dxus kastigo seena'sajū

iyukxtha'w? Aça' Kristo pta'sxni's nyafxte wēse'jsawe'sxa' kwe'sxtxitx

pta'sx, isasa yuja' jīna. ⁴ Txāawe'sxçxáa isasa yuja' jīmeeta', Dxus yuuk

isasa yuhna sūhna jiyukahn kim yuhwa ājanimeesa's kaavxya'jal'. Sa'

Dxus Espiritu pu'çxte kīhte yuhwa sxiigmée selpiina fxi'zewa'jtx ũsku

teeçxsa na'wēçxah, txajx ũs wēeni yu's jxuka.

Jesukristo' kwe'sx yakh pxakhsa na'wēk yuu

⁵ Na'wē Kristoçxaçxá's nwēese'jwa'j en pa'jana jī'tha'w txāa ente

jxkaahwa'ja's angeleswe'sxtxi nvxihtme' Dxusa'. ⁶ Txā'wē meek yu'

txajíiçxáak na'jīna teeçx ajkhē pta'sxi' Dxus libroute:

Nasa' çma'wēsana aça txā'sa' peeygāja'?

Nasa pçuwa'jsaçxá's çkijxa'ga txakwe wala pa'pçxuna yaaki'?

7 Nasa's maz en yu' angeleswe'sxte ähmeekwesa na'wëg nvxiht,
 Nawa jxthaakwe walasa yuuwa'lj vxitçxag nvxiht,
 Txã'wë yüuçxa iidx vxitnitxi' txãaçxaçxáa jxkaajxa' äjawa'ja's üsgu.

8 Kîhwa jxuka txãaçxaçxá's nwëese'jwa'ja's vxitgu jî'k.

Dxusa' txã'wë jxuka txãaçxaçxá's nwëese'jwa'ja's vxit yã'lçxa', kîh
 yuhwa nwëese'jwa'jsamée yu' nvxihtme!. Txã'wëtewa açxpkaçx
 txãaçxaçxá's kîhwa jxuka nwëese'jni yu's iuymeetha'w. 9 Na'wë maz
 en yu' angeleswe'sxte ähmeekwesa vxitku txã' Jesusa' txã'snak Dxusa'
 kwe'sx jxukaysa pa'gate uuwa'lja vxit. Nawa açxha' Dxus pukate u'pa',
 txãaçxaçxáa jxkaahwa'lja yuuçxa txã'wë pxthaa yuuçxa uupa'ga.

10 Kîjkîhnawa jxuka vxit-sa Dxusku txajx luuçx yuuwa'lja yuutxi' jxuka
 nwe'weçxa txajx tasxte nuypa'lja' Jesukristo's pxthaa yuuçxa uuwa'lj vxit,
 kîhte yuhwa sxiigmée nwe'wesa yuukahn. 11 Txã'wë pkaltxi peltunâyni
 vxite' pkaltxi peltunâysa txãa yakh e'zsa' teeçx Neytewe'sxçxaçxáata'
 txãa Neya' Dxusa'. Txã'wë teeçx Neytewe'sxçxáa ne'tka'w, txãa pa'gak
 Dxus Nçxi'ka' kwe'sxtxi's thaamemée Adx nyakh jîna we'we!. 12 Txã'snak
 Dxus librute na'jî':

Idx ma'wësatewa adx nyakhwe'sxtxi pta'sxi'nja,

Sa' adx nyakhwe'sx ksxavxyte idxa's weçxana tuuthe'je'nja jî'k.

13 Sa' vxite ajkhëwa na'wëk we'we':

Adxa' Dxusçxáana yajkxna fxi'ze'nja.

Sa' ki'kin we'weçxa':

Dxus üsni luuçx ayte üsta' txãa yakh ayte üsthu jî'k.

14 Nasawa pxakhsa jîni'sa' maazkuëeçxawa kxazîi teeçx ney kakwe
 petx ee jxpa'gaçxa yuuçxáatx pxakhsa yu', txãa pa'gak Jesuswa pxakhsa
 yuuya' nasaa kakwe's jxpa'ga uuya' äjaya'. Txã'wë yüuçxak kluuste
 uuçxa uuwa'lj vxit-sa's knay. Txã'wë nasatx uuwa'lj vxit-sa' eçxthë'kh
 yu'. 15 Txã'wë yüuçxak Jesusa' jxukaysatx nwe'we bagaçxtewa uuwa'lja's
 üukhna yuuçxáa fxi'zenijü. 16 Txã' angeleswe'sxtxi pu'çxya' kîhme',
 wejxwa nasa Abrahan jiljtxku pu'çxya' kîh. 17 Txã'wë nasatx pu'çxya'
 äjaya'k kwe'sx na'wësa yuu kîhtewa jxuka. Txãasak nyakh na'wë yuuna
 pa'lçxa kwe'sxtxi peeygäawa'lja's jil'phuçxa pkalsawe'sx pa'gate Dxus
 tasxte we'wewa'lja yuu. Sa' nasaa pkaltxi jxuka peltunâyya'k pxthaa
 yuuçxa uuwa'lj jil'phuna üsu!. 18 Txã'wë nasaa kakwe's jxpa'gaçxak
 pkalte kwe'sx çxhãçxhamée fxi'zeni's jxuka jiyu. Txãasa açxha' pkalte
 çxhãçxhamée fxi'zesatxi's kîhte yuhwa sxiigmée nwe'weya' äjawa'lja'.

Jesuçxáa Moiseste thaakwesa'

3 1 Yakhthë'ljwe'sx i'kwe'sxa' Dxus pa'yanisa i'kwe yuu txãa jîi
 yuuwa'lja, txãa pa'ga wala ew mjiyuwe Kristo Jesusa's. Txã' Dxus
 kaahnisa', pkalsawe'sx pa'gate Dxus tasxte we'wewa'lja, sa' Dxus yakh
 kwe'sx fxi'zewa'lja's pta'sxsa'. 2 Jesusa' kîhtewa jxuka kxtey yuuk ma'wë

yūuwa'ja's ne' Dxus jxkaah txā'sa' jxuka. Moiseswa ma'wēga Dxus luuçxtxi jxpe'jwa'ja's jxuka kxtey yuu, txā'wēyku Jesuswa kxtey yuu. ³Nawa Jesusçxáa Moiseste thaakwe jxtuhthesa', ma'wēga yat namuçxáa jxtuhthe yu' aça' yatte selpiisáa yu' jxtuhthe meek yu', txā'wēy Jesusçxáa jxtuhthesa'. ⁴Yata's kimçxáawa txachte yujk yat yuuna pa'ja', nawa namu yu' Dxusa'. ⁵Moisesa' selpiisaaçxáaçxawa txā'wēk kīhte yuhwa peejxmée jxuka kxtey yuu Dxus luuçxtxi jxpe'jna, nawa txajx selpiini yu' e'su Dxus kīh yūuya'watewa txāatx kaajiyu'jsaçxáak yu'. ⁶Naapkaçxha' Kristo' selpiisamée Dxus Nçxi'k yuuk yu', txāasa Dxus luuçxa' kwe'sxtha'w txāatx kīhte yuhwa peejxmée jxpe'jwa'jsa', kwe'sx yuu uu entepkaçx txutemée txā's yuuçxáa weçxana fxi'zete yu'.

Dxus luuçx, Dxus tasxte jxkaasena ūswa'j

⁷Txāa pa'ga txāa yakhçxáa fxi'zewa'ja's na'wēk pta'sxi' Dxus Espiritu':
 Åçxh Dxus we'weni's wēse'jyā'jçxa',

⁸I'kwe'sx ūuste wa'l yaakxnuwe. I'kwe'sx yaçgawe'sxwa na'wēt_x
 wa'lna ūsu' txā'wē yūunuwe.

Txā'wē wa'lçxa txāawe'sxa' Dxusa's kvxissatx na'wē yuu nasa
 u'pnmée kiwete.

⁹I'kwe'sx yaçgawe'sxa' kxtee ūççxa',

Txakwe kuarenta anxupkaçx txāawe'sxtxi adx kījkihtewa ew yūuna
 pu'çxni's uyçxawa,
 Adxa's wa'ltxi.

¹⁰Txāa pa'gath txāa nasa yakh wēt fxi'zeya' ājameeçxa na'ljīna we'we:
 Adx kaapiya'jni's wa'lçxa, txāawe'sx ūuste jxpubanaçxáatx fxi'ze'.

¹¹Aça' txā'wē yūupa'ga, txāawe'sxa' adx yakh jxkaasena ūswa'the
 u'kameetxna jīnath jurāy jī'k.

¹²Txāa pa'ga, yakhthē'jwe'sx, wala mpa'yajkxwe, txā'wē Dxus we'weni'
 weh yuhwa isameesana sūhna ewmée yajkxçxa Dxus itxisa tasxu
 txuteeya'mée. ¹³Txā'wē yūumée, jwee'fiçxáa çxhāçxha yaakxwa'ja's
 een isa puutx pu'çxna mfxi'zewe, kxah i'kwe'sxtxi' maa yuhtxwa
 pkala' kaypuba'lmeena, aça' i'kwe'sx ūuste ewmée yaakxwa'ja's
 ji'phumeene'kwe. ¹⁴Nyafxíiwa ma'wētka'w Kristo yakh jxpubamée fxi'ze
 txā'wēesa nmeh entepkaçx fxi'zeçxa', txāa yakh ūswa'ja's ji'phu'nja'w.

¹⁵Txā'wē wa'lkahmen na'wēk we'we':

Åçxh Dxus we'weni's wēse'jyā'jçxa',

I'kwe'sx ūuste wa'l yaakxnuwe. I'kwe'sx yaçgawe'sxwa na'wēt_x
 wa'lna ūsu' txā'wē yūunuwe jī'k.

¹⁶¿Kimta txā'wē Dxus yuwe's wēse'jçxawa e'su yā'ja' wa'lna ūsu'? Egipto
 kiwejū Moises kutxi'kh txāawe'sx jxukaysatx txā'wē yūu. ¹⁷Dxusa' ¿kim
 yakhga kuarenta anxupkaçx pxūuskwete fxi'zena ūsu'? Pkalte wetepa'ga
 nasa u'pnmée kiwete uutx txāawe'sx yakhku txā'wē pxūuskwete fxi'zena

ũsu! 18Dxusa' ġkimtxiga txã'wě adx yakh jxkaasena ũsya' u'kameetxna jına we'we? Nwěese'jsameetxku txã'jına we'we. 19Dxus we'weni's nwěese'jmeeçxa', u'kaya' ajameeta' txã'sa' açxha' jiyutha'w.

4 1Txãa pa'ga wala jxpa'yakiga. Txã'wěme', i'kwe'sxwa maafi' yu' ivxiituwá'kwe Dxus yakh jxkaasena ũswa'the pa'jwa'ja's ji'phçxawa. 2Txãawe'sxtxiwa ma'wěga jxkaasena ũswa'the pa'jwa'ja's pta'sxni yuu, txã'wěy kwe'sxtxiwa pta'sxnik yuu Dxus yuwe ewte nvxiitwa'ja's. Nawa txãawe'sxtxi' txãa pta'sxni' selpiime', Dxus yuwe' isa kxtey yuuwa'jsana sũhna ũsuh jxuka nwěese'jmeeta' naa pa'ga. 3Dxus we'weçxa: Adx yakh jxkaasena ũswa'the u'kameetxna jına jurâyku. Nawa kwe'sx yu' pejka u'kawa'jsatha'w, Dxus yuwe' isa yuhna sũhnatha'w jxpa'gaçxa nwěese'j naa pa'ga. Na'wě adx yakh jxkaasena ũswa'j jına we'wek txãa yu' nyafxiitey naa kiwe's vxitna jxã'jçxa jxkaasek, sa' açxpa'jwa jxkaasena ũsa' kxte u'kawa'ja's we'weçxak txã'ji'. 4Txajx mjia's vxitna jxã'jçxa jxkaaseni's Dxus libru'te na'jınak we'we':

Dxusa' txajx mjia's jxuka jxã'jçxa', siete ensa's jxkaasek ji'k.

5Sa' kxte txajx jxkaaseni's we'weçxak:

Adx yakh jxkaaseya' u'kaya' ajameetxna ji'.

6Makwe txã'wětewa, maafi' yu' kxtee jxkaasena ũswa'the u'katxna. Nyafxiwe'sxa' ewte neeyũuwa'ja's pta'sxte wěse'jçxawa, Dxusa's nwěese'jmeeçxa jxkaasena ũswa'the u'kameeta'. 7Txã'wě yũuni en skhěwniijũ wala txaçxtek Dxusa' Davxida's na'jına kwe'we'j:

Åçxh Dxus we'weni's wěse'jyã'jçxa',

Wa'lna nwěese'jmée yu' yuunuwe ji'k.

Txãa yu' açxh naa ensuwe'sxwa txã'wěy yũuwe'sxtek txã'ji'. 8Jxkaasewa'j jına we'we'k txãa jxkaasewa'ja' Joswé entewe'sxwaça', Dxusa' e'su txaçxte ki' we'wewa'jmeene' yu' açxh jına. 9Txãa pa'ga jxkaasewa'j thaakwe ewsa nee ũsíçxá' Dxusa's nwěese'jsawe'sx jii. 10Txãa pa'gatey Dxus yakh jxkaasewa'the u'kasa' txãawe'sx mjiiini'jũ jxukatek jxkaase', Dxuswa ma'wěga txajx mjiiini's jxã'jçxa jxukate jxkaase txã'wěy. 11Txãasa Dxus yakh jxkaasewa'the u'kaya' pa'pçxuwaj' ji'ptha'w, Dxus we'weni's nwěese'jmeeta' txãawe'sx na'wě yũumée.

12Txã'wěme', Dxus we'weni' itxisa', kĩhtewa jxuka seelpisa. Dxus we'weni' kçxilx pdxi'p seena' zeksate jxthaakwe zeksa', txãasak ũus dxiite kĩh pkal ji'phtewa jxuka ãate kpajkxwe'we'. Sa' ũusteçxáa yaakxni kĩh yuhnawa paaçte nvxiitu'çme'. 13Dxus vxitnisa' kĩh yuhwa txajx dxi'pte paaçte uynimeete yu' neeyũumeetxna. Kĩjkĩhwa jxuka ãateçxaçxáa ũsta' kwe'sxtxi kastigãywa'jsa ũsa' txajx dxi'pte.

Dxus tasxte pkalsawe'sx ju'gu we'we pu'çxsa' Jesusa'

14Dxus Nçxi'k Jesus txã'wě Dxus tasxte kwe'sx pkalsawe'sx ju'gu we'we pu'çxwa'jsa cielute u'kak, txãa pa'ga txajx tasxuh txutemée

fxi'zega. ¹⁵Txãa pa'gately cielute kwe'sx ju'gu yuusa' txãa yu' pkalte yu' wetemeeçxawa, pkalte kwe'sx çxhãçxhamée fxi'zeni yu'sa' jxuka jiyuk, txãasa kwe'sx ähmeekwesatx jxuka peeygãhna pu'çxwa'jsa'. ¹⁶Txãa pa'ga Dxus tasxte üukhmée utxaaga, Dxus peeygãani's ji'phuçxa kwe'sx thëyte fxi'zenijü nwe'weni yuuya' kîh entewa.

5 ¹Pkalsawe'sx ju'gu we'we pu'çxwa'jsa txhitxhçxa naa kiwete nvxiitnisa' txãa fiçxáa pkalpa'ga tajkx ikhçxa Dxus altalte kabwa'jsa'. ²Pkalsawe'sx ju'gu we'we pu'çxsa' txãa ííwa pkalte nxuste fxi'zesaçxa', nxuste fxi'zeni ma'wëtewa jxuka jiia'. Txãasa jiimeekwesa vxituna fxi'zesatx wala peeygãhna ju'gu yuuwa'jsa'. ³Sa' txãa ííwa ähmeekwe pkalsaçxa', peekx pkalpa'gawa tajkx ikhçxa Dxus altalte kabwa'j ji'phu'k, vxitesa pa'gatewa txã'wëy.

⁴Pkalsawe'sx ju'gu we'we pu'çxwa'jsa' nasaa pwe'sxçxáa yajkxçxa ki'pnisa yu'çmeeta'. Txãawe'sxtxi' Dxusku txhitxhçxa nvxiitu', Aaronwa ma'wëga Dxus txhitxhnisa yuu txã'wëy. ⁵Aça' Kristowa txã'wëy yüunisafiçxáak yuu. Txã' peekxçxáa yu' pkalsawe'sx ju'gu Dxus tasxte we'wesa yuume'. Txã'sa' Dxusku txhitxhçxa nvxiht. Txajíik Dxus librutewa na'jî':

Dxus we'weçxa':

Idxa' adx Nçxi'kgu,

Txãa pa'gath ítxi yuuwa'ja's açxha' üs jînak we'we'.

⁶Sa' vxite ajkhëwa Dxus librote na'jînak we'weni yuu:

Idxa' pkalsawe'sx ju'gu Dxus tasxte we'we pu'çxwa'jsag bagaçxtewa, Melkisedekwa ma'wëga yuu txã'wëysa jî'k.

⁷Kristo' naa kiwete üsçxa', txajx uuwa'j en jxuka utxaaçte', Dxus nwe'weya' äjawa'jsa dxi'pte wala pxthaa sus neewe'wek ü'nena, aça' Dxusa' wëse'kh txajx pxthaa we'weni's. ⁸Kristo' makwe Dxus Nçxi'kçxawa, iiméh wala pxthaa yuuwa'ja's jiyuçxa, nwëese'jwa'ja'swa piyak. ⁹Txã'wë kîh pxthaa yuunisatewa jxuka jiyuna jxã'lççak, bagaçxtewa nwe'wena nes yuuwa'jsa yuuna pa'j jxukaysa nwëese'jsa yuutxi's. ¹⁰Txã'wë yüunijük Dxusa' pkalsawe'sx ju'gu we'we pu'çxwa'jsa vxit, Melkisedek na'wëysa.

Dxusa's jiiçxa txajü txuteete' üukhüukhsa'

¹¹Na'wë pta'sxi'th txã'sa' wala we'wewa'j ji'phíiçxáath, nawa i'kwe'sxa' jiyuuya' äja'çmeei'kwe, aça' wala thëya' ew pta'sx wëete yu'.

¹²Dxusa's jiyuni txakwe txaçxte', i'kwe'sx yuu kaapiya'jsa yuupkaçxte, nee peejiíçxáa i'kwe Dxus kaapiya'jni thëymeekwesa's ki' peena ew pta'sxwa'j. I'kwe'sxa' luuçx na'wëysaçxáa i'kwe, kîh ü'a'swa ü'wepkaçxte, luuçx ü'ni leçxi'sçxáa i'kwe ü'we'. ¹³Txã'wë leçxiçxá's ü'sa' luuçx le'çxkwe kçxu'çxu'jnisa na'wësaçxáata', txãasatx Dxus yakh ew fxi'zewa'j yu'sa' jiyu'çmée. ¹⁴Nawa thë'jsa yã'ja' thë'jsa ü'nisatx jxpa'gawa'ja', kîh ewsatxna vxite' kîh ewmeesatxna nawa txãatx jxuka jiyuuya'.

6 ¹Txãa pa'ga Kristo kaapiya'jni nyafxte thëymeekwesatx pta'sxtha'w txãa yakhçxáa fxi'zemée, jweeíçxáa wala piyana ul'jwa'l j'i'ptha'w, sxiigna fxi'zeyamée. Nyafxte kaapiya'jnisa yakhçxáa yu' fxi'zemeeyuuga. Txã' naata': pkaltxi nvxihtçxa Dxus tasxte sxawedni, Dxusa' üsyuhna sũhna üsuh jxuka yaakxni, ²yu'te ya'bautisãyni, Dxusna selpiwa'jsatx txhitxçxa Dxus kusete neewe'weni, ki' itxi yuuwa'ja's kaapiya'jni, Dxus kastigo iiméh seena'te pa'jwa'ja's pta'sxni, txãa nyafxte kaapiya'jnisa'ta'. ³Dxus pu'çxte' jweeíçxáa piyana ul'jwe'nja'w.

⁴Txã'wëme', maawa Dxus yakh fxi'zewa'ja's ew jiisa, Dxus peesku ewte neeyüwa'ja's txã'snawa ew jiisa, Dxus Espiritu'swa üuste jxpa'gasa, ⁵txã'wëy Dxus yuwe ewsatewa jiisa, nmeh ente' Kristoçxaçxáa jxkaahwa'ja'swa jiisa, ⁶txã'wë kíhtewa ew jiisa Dxus tasxuh txutesatxi' peena kaasxwedul'j wëete ya'aja'çme'. Txãa pa'gatey txãawe'sxa' Dxus Nçxi'ka's ew jiiçxawa ahçena weeçxçxa kluuskhë ki' ki'psa na'wë yuusaata' naa pa'gak ya'aja'çmée. ⁷Txãawe'sxtxi' na'wëtha'w kaaja'da'ja': Kiwe mjii'nisa' nus pa'jni yu'a's jxuka çxazxate', uuthasx ewsak kaseje', Dxus pu'çxte mjii'sawe'sx jii. ⁸Nawa ewsa kasehmée jxũth kíhte yuhwa seelpimeesaçxáa buçxate', kiwe txã'wësa's nmehte' thegnimée yuuna. Txã'wëy maawa Dxusa's jiiçxa ki' txutesá' kíhte yuhwa seelpimée, ivxiituni yuutxna.

Dxusa' kxtey yuuna sũhniisak çxhãçxha kaafxi'ze'je'

⁹Nawa i'kwe'sx yu' txã'wë yuumée, Dxus nwe'wenijüyã'ja' jweeíçxáa wala ew yũuna fxi'zene'kwe sũju'th. ¹⁰I'kwe'sx txã'wë ew yũuna yakhthë'jwe'sxtxi peeygãhna pu'çxna äate kaavxya'ja'jna açxpkaçx txã'wë ew yũuna nes txã'wë i'kwe, naa pa'ga Dxusa' i'kwe'sx ew yũuni's peçxkanameena. ¹¹Nawa adxa' nmeh entepkaçx txã'wë kaavxya'ja'jna pa'pçxuna nesthu yũu jxthãasu' teeçxsa na'wëçxah. Txã'wë yũuçxa', kxulmée pa'pçxusa yuune'kwe. ¹²Wa'lwa'l'j yu'sa' le'çxkwe yuhwa ji'phunuwe, yaçgaywe'sxwa ma'wëta Dxusa' kxtey yuuna sũhna üsuh jxuka yajkxçxa Dxus peesni's jxpa'ga txã'wëy myüuwe.

¹³Miiyajkxwe, Dxusa' Abrahana's pu'çxwa'ja's puutx we'weçxa' peekx yase'síiçxáa kxsusna jurãyku, vxite txãate jxthaakwesa yu' meek yu' naa pa'ga. ¹⁴Sa' na'j'ik: Isa, iidx jil'jtx wala nuyphehnana idxa's pu'çxwa'jsath jĩnak jurã. ¹⁵Aça' Abrahana' wa'lmée üythasçxa', jxpa'gak Dxus ma'wëne' yũuya' neeyüu txã'sa' jxuka. ¹⁶Aça' nasawa juraíççxa', txãawe'sxte jxthaakwe walasa's kxsusnatx jurai', kxtey yu'nja jĩna. Txã'wë yũute', isxiimée kxtey yuuna sũhwa'jçxáak ya'ji'phu'. ¹⁷Txãa pa'gak Dxuswa txã'wëy jurã: Adx puutx we'weni's kxtey yu'nja jĩna. Dxusa' txajx puutx we'weni's le'çxkweçxáa yuhwa yu'pthehmée kxtey yuuya'k üsu', açá' txã'sna jxpa'gawa'jsa' kxtey yuuyujuna sũhnaçxáa üskahnku txã'wë yũu. ¹⁸Dxus jurãyni' e'z jwedtxi yu': Kxtey yu'nja jĩna

we'weni vxite' txajx yase's kxsusni. Txãa pa'ga txajx puutx we'weni' yu'pthehmeetxna. Kxahtha'w Dxusa' txajx puutx we'weni's kxtey yuuyujuna Dxusna pakwesaatxi's sũhna çxhãçxha yaakxwa'ja's ji'phu'.¹⁹ Dxusa' txajx puutx we'weni's kxtey yuuna sũhnisak kwe'sxtxi's jxpubamée çxhãçxha kaafxi'ze'je', txãa pa'gatey kwe'sxa' cielute ũssa Dxus puutx we'weni kxtey yuua'ja's jiiçxatha'w ũythasu' naa pa'ga.²⁰ Jesusa' cielute Dxus ũsnitek u'ka, Dxus tasxte pkalsawe'sx ju'gu we'we pu'çxçxa kwe'sxtxi kxtee ka'ga'jya'. Txã' Melkisedek na'wēsak yu'.

Jesusa' Melkisedek na'wēsa'

7 ¹Naa Melkisedekha' Salem çxhabte jxkaahsak yu', nawa txãa'ĩçxãa pkalsawe'sx ju'gu we'we pu'çxsak yu'. Aça' teeçx ente' Abrahana' gweçxate puina ũççxa', naa kiwete jxkaahsa ewmeesatx knayçxa sxawedna pa'jaçte', Melkisedekha' pu'thegya' kasehçxa bedicion akhte',² Abrahana' diesmo dukhku makwene' dukhwa'j ji'phu' txãa yu's jxuka. (Hebreo yuwete' Melkisedek jĩnisa' Ew Jxkaahsa jĩnisa', aça' Salem jĩnisa' wēt fxi'zeni jĩnisak yu'. Txãasa Melkisedekha' wēt fxi'zenite ew jxkaahsa' jĩnisa'.)³ Sa' txajx ney txajx nĩ'j txajx yaççawe'sx txãatxi's ya'jiyu'çme', txajx upxhni en txajx uuni txã'wēsaççxa yuhtxwa. Txãasa Dxus Nçxi'k pkalsawe'sx ju'gu we'we pu'ççna nes yuusa na'wēysak yu' Melkisedekha'.

⁴ Æçxha' ew mjiyuwe: Melkisedekha' iiméh wala jxtuhthesa yu'k. Txajĩik kwe'sx yaççawe'sx Abraham yuhwa diesmo's txã'sna dukh gweçxate puiiçxa txajx jii'txi's ki' kusa'jni's. ⁵ Moises leya' naasãa Levxi jii'j yuuçxáatxku jxkaaja' txãawe'sx nwe'sx diesmotx jxpa'gawa'jsa. ⁶ Txã'wētewa, Melkisedekha' Levxi jii'jmeeçxawa Abraham dukhni diesmo's jxpa'gak, sa' Abrahana' makwe Dxus txhitxhnisatewa Melkisedekha' bedekĩyku. ⁷ Bedekĩysa' bedekĩynisate jxthaakwe walasa' txã'sa' txã'wēme' jiya' ajameetxna kim yuhwa. ⁸ Æçxh naa ensu kwe'sx pwe'sx dukhni diesmo's jxpa'gasa' nasa uuwa'jsaçxáata'. Nawa Dxus libruete Melkisedekha's we'weççxa': Bagaçxte yuhwa uumée itxi ũssa jĩna we'weç na'wēk pta'sxi': ⁹ Levxi jii'jwe'sx jxukaysa na'wē diesmo's jxpa'ga'tx txãawe'sxwa diesmo's dukhsatx yuu Melkisedekna. Ew jiyute yu', txãawe'sx jxukaysa pa'gate Abrahanku dukh. ¹⁰ Txã'wēk yuu jikahnii Abrahana' Melkisedek yakh puutx uyçça diesmo's dukheçte', Levxi jii'j yuua'jsa' Abraham kakweju kasehmeetxi yu'.

¹¹ Ley nvxiitnisa Aaron jii'j levxiwe'sxçxãa txã'wē nasa pkalsatx Dxus tasxte kuutxa'jya' ajawaça', vxite kaahwa'j peejxmeene' yu', Melkisedekwa ma'wēga Aaron jii'thewe'sxmée yu' txã'wēysa. ¹² Txã'wē pkalsawe'sx ju'gu we'we pu'ççsa levxiwe'sxtxi kutxi'jçça', leynawa phu'se'jwa'ja'. ¹³ Na'wē vxite kaahwa'ja's we'we'k txã' kwe'sxtxi jxpe'jsa Jesukristo's we'weççak txã'ji'. Jesukristo' Israel nwe'sxççawa, Aaron jii'thewe'sx meek yu'. ¹⁴ Judá jii'thewe'sxku yu' txã'sa' ew jiiitha'w. Aça'

Judá ji'thewe'sxa' kim yuhwa pkalsawe'sx ju'gu we'we pu'çxwa'ja's ji'phmeeta'. Txajíik Moisesa' txã'wẽ yũuwa'ja's Judá ji'thewe'sxtxi' maa yuhtxwa kxsusmée.

¹⁵ Aytek isa ew ya'jiyu' leya'swa phu'se'jwa'ja's. Txã'wẽ phu'se'khaníi pkalsawe'sx ju'gu we'we pu'çxwa'ja's ley nvxiitnisamée, Melkisedek na'wēsak yu'. ¹⁶ Txã' ley txhixhçxa nvxiitnisamée, bagaçxteçxáa yuhwa pçumée itxi fxi'zewa'jsak yu'. ¹⁷ Txajíik Jesusa's we'weçxa na'jĩ Dxusa':

Idxa' bagaçxtewa pkalsawe'sx ju'gu we'we pu'çxna nes yuune'ga, Melkisedek na'wēsa ji'k.

¹⁸⁻¹⁹ Txajíik Moises leya' nasa pkalsatx Dxus tasxte kuutxa'jya' ājamée ma'wēçxáa yuhwa, txāa pa'gak txāa leya's phu'se'jni yuu. Aça' açxha' txāa leyte jxthaakwe ewsa ji'ptha'w txāa yakha' Dxus tasxte utxaaya' āja'tha'w.

²⁰ Dxus tasxte kuutxa'jya' ājawa'ja's Dxusa' nvxiituççxa' juraĩmée yu' nvxihtme'. ²¹ Dxus tasxte kuutxa'jya' ājawa'ja's jīnisa nyafxiiwe'sxtxi' Dxusa' juraĩmeek nvxiht. Nawa Jesusa's txã'wẽ yuuwa'ja's nvxiituççxa', jurāyççak nvxiht. Txajíik Dxus librute na'jīna we'we':

Idxa' bagaçxtewa pkalsawe'sx ju'gu we'we pu'çxna nes yuune'ga jīnak Dxusa' txajx we'weni's jurāy na' yu'pthehmeena.

²² Txāa pa'ga Jesusa' jxthaakwe ew puutx we'weçxa nvxiitnisa'.

²³ Pkalsawe'sx ju'gu we'we pu'çxsa nyafxiiwe'sxa' wala kuh yu'tx, txāa pa'gatey uunatx u'jwe'. Txāasatx teeççxáa yu' u'pxa' āja'çmée. ²⁴ Nawa Jesusa' uuwa'jsame', txāasa pkalsawe'sx ju'gu we'we pu'çxna ūswa'ja's vxitetx nvxihtmeena. ²⁵ Sa' txā'sna pi'kççxa Dxus tasxte utxaawa'ja's pakwesáa yuutxi's nwe'weçxa, bagaçxte yuhwa vxituwa'jmeete nvxiht-ya' ājana, txāa pa'gatey txā' bagaçxte yuhwa uumée itxi nes yuuwa'ja's, pkalsawe'sx ju'gu we'we pu'çxna.

²⁶ Pkalsawe'sx ju'gu Dxus tasxte we'we pu'çxsa' Jesus na'wēsa ewsatha'w peeçx yu'. Txā' kīh pkal yuhwa ji'phmeesa, bagaçxte yuhwa ewmée yūuna fxi'zesamée, naa kiwetewe'sx na'wēsa meek yu'. Txāasak Dxus pukate kähpkaxç jxūna u'jnisa yuu. ²⁷ Pkalsawe'sx ju'gu we'we pu'çxwa'ja's nyafxiiwe'sxa' na'wētx een isa tajkx ikhçxa Dxus altalte kabu' txã'wẽ yūuwa'ja's meek yu'. Txāawe'sxa' nyafxte' peekx pkalpa'ga khu'ly txã'wẽ tajkx kabçxatx nasaa pkalpa'gawa txã'wēy yū'. Nawa Jesusa' een isa txã'wẽ tajkx ikhme', txāa yuuk uu tee dxi'jçxáa jxukaysa pa'gate. ²⁸ Pkalsawe'sx ju'gu we'we pu'çxwa'jsatx Moises ley nvxiituççxa', naa kiwete nasa āhmeekwesaçxáatxku nvxiitu'. Nawa ley skhēwnite Dxus jurāyççxa txã'wẽ yūuwa'ja's nvxiituççxa', txajx Nçxi'k iiméh thaakwe ewsa'sku nvxiht bagaçxtewa nes yuuwa'ja's.

Dxus u'se puutx we'weni's kxtey yuukahn pu'çxsa' Jesusa'

8 ¹ Na'wẽ pkalsawe'sx ju'gu Dxus tasxte we'we pu'çxsa ji'tha'w txā' maatewa jxthaakwe ewsa cielute Dxus pukate kaçççxa ² pkalsawe'sx

ju'gu we'we pu'çxna ũsa' Dxus ũsnite yuu u'kaçxa. Txãa Dxus ũsni' nasaa txaahnisame', txã'sa' Dxus yuuk txah. ³Pkalsawe'sx ju'gu we'we pu'çxna ũssa nyafxiiwe'sxa' pkalpa'ga tajkx ikhçxa Dxus altalte kabna nes yuuwa'jsa jïçxa nvxiitnisatx yu'. Txãa pa'gak Jesukristowa kîhçxáawa nuykúuwa'j ji'phu. ⁴Jesukristo' naa kiwete txã'wê pkalsawe'sx ju'gu we'we pu'çxna ũswa'ja's vxit wêewaça', ájawa'jmeene' yu', txã'wê ájakahmení Moises ley nvxiitnisatx ũs yu' pkalsawe'sx ju'gu we'we pu'çxsa. ⁵Nawa naa kiwete txã'wê pkalsawe'sx ju'gu we'we pu'çxsa' naasáa cielute ma'wêçxah yúuwa'jna txã'sna kaajiyu'jniçxá'stxi selpi'. Txã'wê cielutewe'sxa's kaajiyu'jnitate íçxáak Dxusna neewe'wena ũswa'j yat Moises txajaçte', Dxusa' na'ljina we'we: Ew mtheg, sa' thã'j vxiçte adx ma'wê kaavxya'ja'the', txã'wêy yúune'ga jîk. ⁶Nawa Dxus tasxte kwe'sx ju'gu we'we pu'çxsa Jesukristo selpiini' thaakwe ewa', txãa pa'gatey Dxus thaakwe ew pu'çxwa'ja's iiméh ew puutx we'wek txã'sna selpiina ũsa'.

⁷Nyafxíi puutx we'weni' ew kasehwaça', e'su ki' puutx we'wewa'j peejxmeene' yu'. ⁸Nawa txã'wê ew kasehpa'gamée, nasa' ewmée fxi'zepa'ga, Dxusa' na'ljîk:

Israel vxite' Judá yakh adxa' ki' u'se puutx we'wewa'j en pa'jana,

⁹Egipto kiwejú peeygáhna kutxi'ljçxa i'kwe'sx yaçgawe'sx yakh puutx we'weth txã'wémée yuuna.

Txãa ente' adx puutx we'weni's kxtey yuumeeta',

Txãa pa'gath thegmée nvxiht.

¹⁰Nawa txãa e'su' Israelwe'sx yakh na'wê puutx we'we'nja jî'k Dxusa': Adx jxkaahnitxi's txãawe'sxtxi kaajiyu'ljçxa, ũuste fxi'ljçxa nvxiitu'nja.

Sa' adxa' txãawe'sx Dxus yu'nja,

Aça' txãawe'sxa' adx jîi yuutxna.

¹¹Dxusa's jiyukahn teeçxsa na'wêçxah kaapiya'jwa'j ji'phumeetxna, txãawe'sx nwe'sx vxite' txãawe'sx nyakhçxáa yuhtxwa,

Txãa pa'gatey le'çxkwesa ma'tx yuu meeçxa' thê'jsa ma'tx yuu nawa thêymée jiyuya' ájatxna adxa's.

¹²Sa' txãawe'sx pkaltxi peltunâyçxa, peena yu' bagaçxteçxáa yuhwa yajkxme'nja txãawe'sx pkaltxi's jî'k.

¹³Dxusa' ki' vxite u'se puutx we'wewa'j ji'pthu jïçxa', yaçíiwe'sxa' selpiime' jïçxane' txã'jî'. Aça' selpimée yuuna pa'jsa' skhêwwa'jsana.

Dxus ũsni naa kiwetewe'sx vxite' cielutewe'sx

9 ¹Dxus puutx we'wenisa nyafxiiwe'sxa' jxkaahni ji'phuk Dxusna neewe'wena kxtey nwêese'khan dxuus yat naa kiwetewe'sxçxáaçxawa. ²⁻⁴Txãa yata' e'z jwedku txudeni yu': nyafxte u'kana kúunisate Dxusna neewe'wena ũsni jînisatetx bela txaahnisa vxite' pan ásxni mesa vxuyu bee altal incienso kabnisa txã'wêsa ũsu'.

Aça' e'ste txudenisate' kim yuhwa u'kanimeesa naasáa Dxus yuuçxáa ũsni jīnisak yu'. Kxteea' kaja vxuyu behçxaçxá's jxuka skadnisak ũsu'. Txāa kaja dxiite yu' teeçx vxuyu bee jaçxu maná ji'phsa, vxite' Aaron khaabu ye'çxku txāa, vxite' Dxus jxkaahni kwet taplate fxi'jni yuuk txāatx jxaawni ũsu' kaja dxiite. ⁵Txāa vxuyu bee kaja kajkwete yu' Dxus angel na'wēysatx piisaçxa txaahni ũsu', Dxusa' ayte nesku yu' jīna kaajiyu'jsata'. Sa' txāawe'sx fxuu ku'taju jxukatx aphna ũsu', na'wē pkalpa'ga tajkx ikhçxa txāa eea's jxūna kühçxa txaja'tx txā'sna. Nawa txā'wēsax ew āate pta'sxwa'j en ji'phmeeth açxhí yu'.

⁶Sa' txāa yatte txā'wē pheu'jni nyafxte u'kana kūnute yu' pkalsa ju'gu we'we pu'çxsawe'sxa' u'kana nestxi yu', ma'wē yūuwa'ja'swa kxtey yuuna. ⁷Nawa vxite ahte e'ste yu' txāawe'sx npiičthē'j teeççxáak u'ka', anxute tee dxi'jçxáa. Sa' kxtee u'kaççxa', perdon pējxya' takx eea's jxūçxak u'ka', peekx pkalpa'ga vxite' nasaa pkalpa'ga jīi yā'jçxa. ⁸Txā'wē nyafxte u'kanisa Dxusna neewe'wena ũsni jīnisa' selpiina nesku yu' Dxusa's neewe'wewa'j. Nawa vxite ahte Dxus yuuçxáa ũsni jīnite u'kawa'j dxi'j yu' phatemeyku yu' txā'wēk Dxus Espiritu' kaajiyu'ju'. ⁹Kīhwa jxuka txā'wē yūunisa' açxh naa ensuwe'sxa's kaajiyu'jsaçxáak yu'. Kxtee tajkx ikhçxa Dxusna weçxana kabnisa' txāawe'sx pkaltxi khukhya' ājawa'jsame'. ¹⁰Txā'wē yūunisa' Dxus yu'pthehpkaççxáatx selpiwa'jsa yu', txāasatx kajkwekhē āakhēwe'sxa'sçxáa jxkaaja' ũ'nisu, tudxnisu, kakwete ate fxi'zewa'j txā'wēsax.

¹¹Nawa açxha' pkalsa ju'gu we'we pu'çxsa thaakwe ewsa ũythasnisaa pa'kh txā' Kristo'. Sa' txajx yujuni' nasaa vxitnisa naa kiwetewe'sxmée, cielute iiméh ewstate u'kaçxa kxtee pkalsa ju'gu we'we pu'çxna selpiina ũsa'. ¹²Sa' Kristo' Dxus yuuçxáa ũsnite kīh pkal yuhwa meetek u'ka. Nawa txā' kapla ee vxite' klaa luuçx ee txā'wēsax jxūçxa Dxus tasxte u'kame'. Txajx ee yuunak pkawçxa u'ka tee dxi'j yuuçxáa. Nawa jxukaysa bagaçxteçxáa yuhwa vxitumée ewte neeyūuwa'ja's vxit-ya'k txā'wē yūu. ¹³Na'wē klaa ee kapla ee vxite' klaa luuçxa's altalte kabnisa khuuç txā'wēsax nasaa kakwekhē pē'çhuçte', āakhē kazx pētheni's yaatesaa dxihte', ¹⁴Kristo ee yu' wejx thaakwe yaateya' ājawa'jsana. Txā'wē yaateya' ājakahní, Dxus Espiritu' pçuwa'lmeesa pu'çxte Kristo' peekíi ya'dukhçxa kīh pkal yuhwa ji'phmeek txajx eea's pkaw pkalsa pa'gate. Txāasa txajx eea' kwe'sx ewmée ũus yaakxni dxiitewe'sxa's khukhwa'jsa, Dxus itxisa's selpiiya' ājakahn.

¹⁵Dxusa' kwe'sxtxi nwe'wewa'ja's u'se puutx we'wek txā'sna Jesukristo' kxtey yuuna ũsa', na'wē nyafxte Dxus puutx we'wek txā'sna nwēese'jmeeçxa pkalte wetetha'w txāa pkalwa peltunāynik yuu Kristo uupa'ga. Txah Jesukristo nwe'wenisawe'sxa' jxpa'gaya' ājatxna Dxus jīi bagaçxteçxáa yuhwa pçuwa'jsamée kwe'sx jīiçxaçxáa yuuwa'ja's nvxihtku txā'sna. ¹⁶Nawa na'wēsa's miijajkxwe: Adx uute', adx ji'phuni's idx

uweene!ga jīna puutx we'weçxa eçte fxi'jçxa nvxiitnisa!, selpiiyujuna. ¹⁷Nawa txā'jīna nvxiit-sa uuteçxáa txāa eça' selpiina. Txā'jīna nvxiit-sa uumeyte yu!, txāa eça' selpi'çme!. ¹⁸Txajíik Dxusa' nyafxíi puutx we'wena fxi'jçxa nvxiitnisa'swa ee pkawçxa nvxiht selpiina neeyūukahn. ¹⁹Txā'sa' na'wēk yūu Moisesa': Nasa jxukaysatx pta'sxku ley jxkaahni ma'wētewa jxuka. Txā'wē yūuçxak khas beh vxite' ējxa ku'ta yakh klaa luuçx ee vxite' kapla eete yu' ka'dnisate akhçxa Dxus puutx we'wena fxi'jçxa nvxiitni eç kajkwesu pē'çhuç. Sa' nasatxwa jxukaysatx txā'wēyku yūu na'jīna: ²⁰Dxusa' na'wē i'kwe'sxtxi jxkaahna puutx we'wena fxi'jçxa nvxihtku txāa eça' āçxha' i'kwe'sxtxi jxkaahna selpiiya' ājana, ee pkawni yuupa'ga jík. ²¹Sa' Dxusna neewe'wena ūsni yat vxite' kxtee kīhçxah ne'ta ūsu' txāatxwa txā'wēyku ee yakh pē'çhuç Moisesa'. ²²Ley we'weçxa': Kīhnawa jxuka ee yakh yuuçxáa yaatewa'l yuuna, aça' ee pkawmeete yu!, pkala' peltunāynimée yuutxna jīnak jxkaaja'.

Kristo uuni' pkaltxi jxuka khukhku

²³Txā'wē cielute ma'wēna txā'sna kaajiyu'jsa naa kiwetewe'sxçxáa yuhtxwa yaatena ūswa'l peejtxti yu!, tajkx ikhçxa txāa ee yakh. Aça' cielute ūswa'lsatx yaatewa'l yu' wejxku thaakwe ewsa peejx yu!, tajkx ikhe'tx txā'wēsamée. ²⁴Kristo' naa kiwete nasaa txaahnisateçxáa u'kame!. Txā' cielute yuuk u'ka, sa' āçxha' kxtee Dxus tasxte kwe'sx ju'gu we'we pu'çxna ūsa!, aça' Dxusna neewe'wena ūsni yat naa kiwetewe'sxa' cielute ma'wēna txā'sna txā'wēy piisanisaçxáak yu!. ²⁵Pkalsawe'sx ju'gu we'we pu'çxsa npiičthē'jsa' aanxu isa tee dxi'ljçxáak u'ka', Dxus yuuçxáa ūsni jīnisate. Nawa peekx eemée, takx eeçxá'sku jxūçxa u'ka', kxtee pē'çhuçya!. Nawa Kristo' uuçxa kujus Dxus tasxte u'kame!. ²⁶Txā'wē yūuwaça!, naa kiwe's vxitiyna aanxu isa uuna nesne' yuuwa'ljsa yu!. Nawa txā'wē yūumée, Kristo' tee dxi'lj yuuçxáak kluuste uuya' vxyaa jxukaysa pkaltxi khukhya!. ²⁷Txāa pa'gak nasatxwa tee dxi'ljçxáa jxukaysatx uuwa'ljsa vxitçxa txāa e'su' ma'wēsaçxawa Dxus tasxte paswa'l vxitni yuu, ²⁸txā'wēy Kristowa tee dxi'lj yuuçxáak kluuste uu maazkuēesa pkaltxiwa jxuka khukhya!. Sa' txāa e'su' ki' vxyaana, nawa pkaltxi khukhya' ki' uuya'mée, naasáa txā'sna ūythassatx pe'jna u'jya'çxáa txā'wē vxyaana.

10 ¹Moises leya' naasáa thaakwe ewsa vxyaaya' ūsu'tx txāatx kaajiyu'jsaçxáatx yu' txā' isa ewsa yāl yu'çmeeta!, txāasa na'wē Dxus tasxte utxaaya' aanxu isa tajkx ikhna nestxi yu' txāawe'sxtxi' pkal jī'phmeesa vxit-ya' bagaçxteçxáa yuhwa ājawa'ljsa meek yu' leya!. ²Txāa leya' nasatx pkal jī'phmeesa vxit-ya' ājasaawaça!, na'wē pkalpa'ga maazkuēe uswa tajkx ikhna nestxi yu' txā'wē yūuna nes yuuwa'lj peejxmeene' yu!. Txāa pa'gatey pkalpa'ga tee dxi'lj tajkx ikhçxa kabnijūyāl yu!, pkalsatha'w sūhwa'lj peena yu' ūusuthemeena. ³Nawa txā'wē yūupkaçxte, aanxu isa pkalsatha'w sūhna nesku ya'yū!, ⁴txāa

tajkx ikhnisa klaa ee vxite! kapla ee txā'wēsa' pkaltxi khukhu'çmeeta' naa pa'ga.

⁵Txāa pa'gak Kristo naa kiwete pa'jaçça', na'jīna we'we Dxusa's: Tajkx ikhçxa kabni's jxpa'gameeçxa, adx kakwe yakh uuwa'ja'sgu vxit.

⁶Pkaltxi khukhya' tajkx ikhçxa kabnisatx weçxa'çmeeg.

⁷Txahth na'jī: Dxus, iidx jxthāasniçxá's kxtey yuuya' yuhth, Adx fxi'zewa'ja's ma'wē fxi'jni ūsna txā'sa' kxtey yuuya' jīk.

⁸Na'wē Kristo we'weçxa': Pkaltxi khukhya' tajkx ikhçxa kabnisatxi's weçxa'çmeeg, (txā'wē yūuwa'ja's makwe ley jxkaahnisatewa), ⁹txāa pa'ga: Dxus, iidx jxthāasniçxá's kxtey yuuya' yuhth jīk Kristo'. Isa ew jiyute yu', naa tajkx ikhna ūsni's ivxiituçxa, txāa pa'gate vxite uuwa'jsath nvxiitu' jīçxane' txā'jī'. ¹⁰Jesukristo' Dxus jxthāasni's kxtey yuuçxa txajx kakwe's peekíi ya'dukhçxa kluuste uuk jxukaysa pa'gate tee dxi'jçxáa. Txāa pa'gak Dxusa' kwe'sxtxi's txāa jīi vxit.

¹¹Pkalsawe'sx ju'gu we'we pu'çxsa judiue'sxa' txā'wē yuh een isa maazkuēe uswa tajkx ikhçxa altalte kabna nestxi yu' jxkaasewa'jmée, makwe txā'wē yūunisa' bagaçxte yuhwa pkaltxi' khukhwa'jsameetewa.

¹²Nawa Jesukristo' pkalpa'ga tee dxi'j yuuçxáa kluuste uuni yakhçxáa jxuka jxā'jnik yuu txāaçxáa bagaçxtewa selpiwa'jsa. Txāasak cielute Dxus pukate kaçx. ¹³Sa' āçxha' kxtee ūsa', txā'sna açesa jxukaysa txā'sçxaçxáana nwēese'jwa'ja's Dxus vxitna jxā'phkaçx. ¹⁴Txāa pa'gatey tee dxi'j kluuste uuníi yakhçxáa jxuka jxā'jnik yuu txajx nasa yuuwa'jsawe'sx jīi bagaçxtewa selpiwa'jsa. ¹⁵Txā'wē Kristo tee dxi'j kluuste uuniçxáa bagaçxtewa selpiwa'jsatefīçxáak Dxus Espirituwa na'jīna we'we:

¹⁶Txāa en skhēwnijū' na'wē yūuya' puutx we'we'nja jī'k Dxusa':

Adx jxkaahnitxi's txāawe'sx ūuste kxu'akhe'je'nja peçxkanakahmén.

¹⁷Sa' txā'wē yūunijū', txāawe'sx ewmée yūuna fxi'zeni pkaltxi's bagaçxteçxáa yuhwa yajkxme'nja jī'k.

¹⁸Txā'wē pkaltxi's jxuka peltunāynijūyā'ja', peena yu' pkalpa'ga tajkx ikhçxa kabna ūswa'j peejxme'.

Dxus tasxte utxaawa'ja's ji'ptha'w

¹⁹Txāa pa'ga, yakhthē'jwe'sx, āçxha' kīh pkal yuhwamée Dxus yuuçxáa ūsnite u'kawa'ja's ji'ptha'w, txā'wē Jesukristo' ee pkawçxa ²⁰Dxus tasxte u'kawa'j dxi'j u'sesa's phaadek. Kxtee Dxus ūsnite' kim yuhwa u'kakahmén txudenik ūsu', nawa txāa yuuk kluuste uuçxa kxtee txudeni's phaade kwe'sx u'kakahn. ²¹Txāasa Jesusa' Dxus tasxte we'we pu'çxna ūsa' Dxus luuçx jxukaysa ju'gu. ²²Txāa pa'ga Kristo' pu'çxyujuna sūhna ūusuh jxuka yajkçxçxa Dxus tasxte ūukhmée utxaaga, txāa pa'gatey Kristo' kwe'sx ūuste pkaltxi' jxuka yaatek, aç'a' kwe'sx kakwewa bautismote

akhnik yuu, yuuwemeesatha'w sūhnaçxáa yaakxkahn. ²³ Āçxha' Dxus tasxte utxaawa'ja's jiiyā'tha'w na' Dxus yakh txutemée txāa yakh yuuçxáa çxhāçxha fxi'zega. Txāa pa'gateg Dxusa' kwe'sxtxi bagaçxte yuhwa pçumée itxi fxi'zewa'ja's ūsya' puutx we'wek txā'sa' kxtey yuuna. ²⁴ Sa' ew yūuna peeygāhna fxi'zewa'ja's ji'phuya' puutx ya'pu'çxhiga kxteeçxah. ²⁵ Vxite na'wētx kwe'sx pkhaakheçte pa'ja'çmée txā'wē yūumée, wejxwa teeçxsa na'wēçxah kxteeçxah puutx kçxhāaçxha'jna fxi'zega, na'wē Kristo kīiwa'j enwa utxaaçyā'ja' naa pa'ga.

²⁶ Txā'wē ewsa's āate pta'sxni wala ew jiiçxa txā'sa' ahçena txute'nja'w, aça' txā'wē yūusa's peena yu' peltunāywa'jmée yuuna. ²⁷ Naasáa iiméh seena' ūukhūukhsaçxáak ūythasu', Dxus kastigo ipx seena'sa jxuka ivxiiuwa'jsa Dxusna açesawe'sxtxi. ²⁸ Ma'wēga Moises leyçxáa yuhwa txā'sna nwēese'jsameetxi' e'z meeçxawa tekhnasa txā'wē yūuni's jiiisatx pējçxça isa dxihte', peeygāawa'jmée ikhwa'jçxá's vxitu'. ²⁹ Aça' Dxus Nçxi'ka's ahçeçxa weeçxina, sa' txajx eea's pkawçxa uuni'swa kīhte yuhwa seelpimeesa na'wē weeçxina, sa' txā'wēy Dxus Espiritu peeygāasa'swa açesa', wejx seena' kastigāyni yu'nja'w sūhwa'ja's mji'phuwe, txā'wē Jesukristo eea' Dxus puutx we'weni's kxtey yuua'ja's vxitwa'jsa' txāa eefiçxáa i'kwe'sx pkaltxiwa peltunāysa' na's txā'wē açepa'ga. ³⁰ Dxusa' na'jīnak we'we txā'sa' mpa'yajkxwe: Adxçxáa kastigāywa'jsath, txā'sa' adx jiiine'tka jī'k. Sa' ki' we'weçxa': Adx jxpe'jni nasatxi's kastigāi'nja jī'k. ³¹ Txāa pa'ga seena' yuh ūukhūukha', Dxus itxisa kusete kastigāywa'j wetena pa'the'.

³² Nawa txā'wē yūuya'mée i'kwe'sxa' nyafxiiitey fxi'zeni's miiyajkxwe: nyafxçxah Dxus yuwe's jxpa'gaççxa', wala pxthaa yuui'kwe txakwe wala thēysa pa'thewa. ³³ Sa' i'kwe'sx maafia' wēesxuna nasaa ksxavxyte pāpani i'kwe yuu, aça' vxitewa txā'wēy nxussawe'sx yakh ja'daçxah nxussa i'kwe yuu. ³⁴ I'kwe'sxa' karcelte ūssawe'sx pa'gate peeygāawa'ja's ji'phui'kwe, sa' i'kwe'sx ji'phunitx kusa'jaçte', ūusaçxamée weçxana'i'kwe neeyūu. Cielute bagaçxteçxáa yuhwa pçuwa'jsamée thaakwe ewsa's jiiçxai'kwe txā'wē yūu. ³⁵ Txā'wēsa's jiiyā'jçxa', peçxkananuwe, txāa pa'gateg txā'wēçxáa yajkxna fxi'zepa'ga txā'wē seena' wala ewsa's jxpa'gawa'jsai'kwe. ³⁶ Dxus jxthāasni's kxtey yuuya' nxuswa'ja's wa'lmée jxpa'gawa'j ji'phi'kwe. Txā'wē yūuçxa', Dxus peesni seena' wala ewsa's jxpa'gane'kwe. ³⁷ Txā'wēme', Dxus libroute na'wēk we'we':

Wejx jxthēeyuumée dud yuh kījana

Txāa kīiwa'jsa' txaçxhimeena.

³⁸ Aça' Dxusçxáana yajkxna fxi'zesa' ewte neeyūuna.

Nawa txā'wē yūumée txuteete', txāa yakha' wēt fxi'zeme'nja jī'k.

³⁹ Nawa na'wē txuteeçxa vxituwa'the ūsta' txāatewe'sxmeetha'w kwe'sxa', wejxwa kwe'sx ūus vxitukahmén Dxusa'sçxáa yajkxna fxi'zesatewe'sxtha 'w.

Dxusa's ũuste yaakxnisa

11 ¹Dxusa's ũuste yaakxsa' yafxju āate yu' uymeeçxawa, ũuste yu' jiik ya'fxi'ze! kxtey yuuyujuna sũhna ũythasna. ²Kwe'sx yaçgawe'sxa' txā'wē yaakxwa'ja's ji'phutx, txāasatx Dxus dxi'pte ew fxi'zesa yuu.

³Sa' kwe'sxwa txā'wēy yaakxwa'ja's ji'ptha'w, txāasatha'w āçxh na'wē kiwe ũsa' txā'sa' Dxusa' txajx we'weni yakhçxāa vxitne' nyafxíi yu' kíhwa meetewa sũju'.

⁴Abela' tajkx ikhçxa kabte', Dxusa' weçxayujuna sũhna ũuste jiiçxak txā'wē yũu, Kain jiite thaakwe ewsa. Aça' txā'wē yũunisa' Dxus yakha' ewsanē' yu' naa pa'ga Dxusa' jxpa'gak. Aça' Abel yu' uuni', nawa Abela' txā'wēk Dxusa's ũuste jxpubamēe yajkx jĩni yu' āçxpa'jwa ũsa'.

⁵Enokwa txā'wē Dxusa's ũuste ew jiiçxa Dxus yakhçxāa fxi'zēpa'ga, uumey pe'jna u'jnik yuu cielun. Txāa pa'ga peena yu' uymeeta', txā'sa' Dxusku pe'jna u'j txāa pa'ga. Aça' Dxus libruete Enokha's we'weçxa': Nyafxíi uumey Dxus yakh weçxanak fxi'ze' jĩ'k. ⁶Nawa ũuste Dxusa's yuuçxāa yaakxwa'ja's ji'phmeete', Dxus yakh weçxana fxi'zēya' ya'āja'çme', txāa pa'ga txajx tasxte utxaasa' Dxusa' ũsna sa' txā'sna pakwete', nwe'wena sũhwa'ja's ũuste ji'phuwa'ja'.

⁷Noewa txā'wēy Dxus we'weni' kxtey yuuyujuna sũhwa'ja's ũuste jiik yu'. Txāasak kastigo nus pa'jyujuna sũhçxa Dxus jxkaahni's nwēese'jçxa barko's vxit, txajx yattewe'sxtxi jxuka nwe'weya'. Sa' Dxusa' kxtey yuuyujuna sũhwa'ja's ũuste ji'phupa'ga, Dxusa' kxtey yuute', naa kiwetewe'sxa' ya'kastigāytxi aça' Dxusa' Noea's ewsa' jĩnak we'we.

⁸Abrahamwa txā'wēy Dxusa' kxtey yuuyujuna sũhwa'ja's ũuste jiiçxak, Dxus kiwe ũsya' pa'yate', nwēese'jçxa kasehna u'j, nawa mtee pa'jwa'ja'sçxāa yuhwa jiimeek yu'. ⁹Txā'wē Abrahana' Dxus kiwe ũsya' neeyũune' txā'sa' багаçxteçxāawa kxtey yuuyujuna sũhwa'ja's ũuste jiiçxak maa sũhmēe txagaçxhíi yu' pa'jsa na'wēçxāa tultu txahçxa fxi'zena ũsu'. Aça' Isaak, Jakob txāawe'sxwa txāa kiwe's jxpa'gawa'jsaçxawa, txā'wēyçxāatx pa'jsa na'wē fxi'zena ũsu'. ¹⁰Txāa pa'gatey Abrahana' cielute Dxus vxitni çxhaba's jxpa'gawa'ja'sku ũythasna ũsu', txāasak maa sũhmēe fxi'ze'.

¹¹Abrahana' txā'wē Dxus we'weni' kxtey yuuyujuna sũhwa'ja's ji'phupa'gak Sara' txakwe wala thē'khwe luuçx ji'phuwa'jsamēe yā'jçxawa, luuçx ji'phu. ¹²Txāasak Abrahana' txajx jil'j iiméh wala kuh ji'phsa yuu, cielute estrelxa vxite' yu'pukasu kwetmusetx ma'wēga isate ya'āja'çmēe txā'wēk kuh ji'phu, txakwe iiméh wala thē'khwe yā'jçxawa.

¹³Na'wē Dxusna yaakxsa nakwe wala kuh kxsustha'w txāawe'sxa' Dxus ũsya' neeyũuk txā'sa' jxpa'gamey uutx, txāasatx e'su txaçxteçxāawa Dxusa' kxtey yuuyujuna sũhna weçxana yaaki'. Sa' txāawe'sxa' naa

kiwete tudtewe'sxçxáa ne'tka'w jīnatx we'we. ¹⁴Txāawe'sxa' txā'wē we'weçxa' ew jiyute yu', vxite ahte ūsya' u'jwa'ja's pakwesáa ne'ta yu'. ¹⁵Txāawe'sxa' maa kiweju yuusaaçxawa txā'sna yajkxna ūswaça', txāa kiwení sxawedwa'lj ne'ta yu'. ¹⁶Nawa txāawe'sx ūswa'lj thaakwe ewsa's ne'ta pakwesáa yu' cielutewe'sxna, txāasatx sxawedmé. Txā'wē sxawedmeeta' txāa pa'gak Dxusa' thaame'çmée txāawe'sx Dxusthu jīna ya'kxsuswa'ja's, txāasa txāawe'sx ūswa'lj pheu'jni ji'pha'.

¹⁷Abrahana' txajx nçxi'k Isaakha's ikhtewa Dxusa' ki' itxi vxituna sūhwa'ja's ūste jiiçxak ikhya' jxūna u'j. Dxusa' Abraham kīh yūutewa jiyuya' sūhçxa txajx nçxi'k teeçxçáasa's ikh kaathewa, wa'lmée kxtey yuuya'wak yu'. Makwe Dxus txāa yakh puutx we'weçxa': ¹⁸Iidx ji'lj Isaaktewe'sx txā'wē wala penatxna jīna we'wetewa, ikhya'wak yu'. ¹⁹Nawa Abrahana' txajx ūste yu' uutewa Dxusa' ki' itxi vxituna sūhwa'ja's ji'phu'k. Txāasa isa ew yajkxte yu', Abraham nçxi'ka' uusaawe'sx ksxavxyu ki' itxi yuusáa na'wēsa'.

²⁰Isaakwa Dxusa' kxtey yuuna sūhwa'ja's ūste ew jiiçxak txajx nçxi'k Jakob Esau txāawe'sxtxi' bedicion wala jxpa'gane'kwe jīna we'we.

²¹Jakobwa Dxusa' kxtey yuuna sūhwa'ja's ūste ew jiiçxak uuçyā'lçxa', José nçxi'ktxi teeçxsa na'wēçxah jxukaysatx wala bedekini yuune'kwe jīna we'we, sa' Dxusa's neewe'wek kiiçhuçxa.

²²Josewa Dxus pu'çxte' Israelwe'sxa' Egipto kiwejū kasejetxna sūhwa'ja's ūste ew jiiçxak, uuya'wayā'lçxa txāawe'sxtxi neewe'we txajx kakwe's mtee jxūna u'lçxa pedaawa'ja'swa.

²³Moises neywe'sxwa Dxusa' nwe'wena sūhwa'ja's ūste ew jiiçxatx tekx a'te uta Moisesa's sūth, luuçxa' wala zhiçxkwe yu'ne' txāa pa'ga. Makwe Egipto kiwete jxkaahsa yu' ikh kaathewa ikhmeeta'.

²⁴Moiseswa Dxusa' pu'çxhina sūhwa'ja's ūste ew jiiçxak, Egipto kiwete jxkaahsa niisa nçxi'k jīna kxsusni yuuwa'lj yu'sa' wa'l, walaana kāhçxa'. ²⁵Sa' naa kiwete pkalte weçxana fxi'zepkaçxte, wejxwa ūukhmée Dxus txhitxhnisa yakh ja'daçxah pkxuuni yuuwa'ja'sçxáak yajkx. ²⁶Txāa pa'gately cielutewe'sxa's jxpa'gawa'ja'sçxáak yajkçxa fxi'zena ūsu'. Txāasak Egipto kiwete iiméh seena' wala ji'phuni's yaakipkaçxte, Kristo na'wēy yaaçeni pkxuuni fxi'zeni's ji'phuya'çxáa yajkx. ²⁷Dxus pu'çxwa'ja's ūste ew jiiçxak Moisesa' jxkaahsa ūusçxani yu'sa' ūukhmée Egipto kiwejū kasehna u'j, sa' Dxus tasxu le'çxkweçxáa yuhwa txuteméek fxi'ze, Dxusa' vxyaasameetewa yafxju uyna ūs na'wē yajkxna.

²⁸Dxusa' nwe'weyujuna sūhwa'ja's ew ūste jiiçxak Moisesa' Paskua fxiesta's vxitçxa eea's vxitxkhē sxūsx kaah, ikhwa'lja's angel sēhçxawa Israelwe'sx luuçx nthē'lja's maa yuhtxwa ikhkahmen.

²⁹Israelwe'sxwa Dxusa' pu'çxhina sūhwa'ja's ūste ew jii yuupa'gaçxáak, mar bejuy uykhēwwa'lj dxi'lj phaate txāawe'sx uykhēwkahn. Aça' Egiptowe'sxwa txā'wēy uykhēu'nja'w sūhçxawa txāawe'sxa' ikhtee uutx yu' afxihbte.

³⁰Dxusa' pu'çxhina sũhwa'ja's ũuste ew jiiçxatx Israelwe'sxa' Dxus we'weni's nwẽese'jçxa txã'wẽ siete enpkaçx Jeriko çxhabte muralxa peeku'j tadxina ũsu', aça' txã'wẽ nwẽese'pha'gak muralxa' wete.

³¹Rahabwa Dxusa' nwe'weyujuna sũhwa'ja's ũuste ew jiiçxa, Israelwe'sx e'zsa kxtee peethegu'jya' pa'jsatx ewku jxpa'ga. Txãa pa'gak uumée, Dxusa's nwẽese'jsameewe'sx vxite yu' uutewa.

³²¿Kĩh jwee yu' pta'sxitka? En ji'phwaç yu' pta'sxwa'j yu' walaíçxáa ũsa', Gedeon, Barak, Sansón, Jefxté, Davxid, Samwel, Dxus yuwe pta'sxsawe'sx txãawe'sxtxi we'wewa'j. ³³Txãawe'sxa' Dxusa' pu'çxhina sũhwa'ja's ũuste ew jiiçxatx maaí yu' gweçxate puiiçxa knay, vxite' ewtxi jxkaahna fxi'ze, vxite' Dxus pu'çxni's jxpa'gatx, vxite' león yuwetxwa aphtxi, ³⁴vxite' seena' ipx walajuwa çxhavxymeeta', vxite' ikhsa kusejuwa iyutx, vxite' puiiya' çxhãçxhameekwetewa kçxhãçxha'jnisa yuuçxa, gweçxate iiméh kuhsatxwa knaytxi. ³⁵Naapkaçxha' u'ywe'sxwa txãawe'sx luuçx uunisatx ki' itxi vxitni jxpa'gatx. Vxite' seena' wala pkxuuni yuuçxa uutx, ki' itxi yuwa'ja's ji'phuçxa thaakwe ewte fxi'zeyá' sũhçxa, nwe'wewa'j yu'sa' jxthãasmeeta'. ³⁶Naapkaçxha' vxite' weeçxna peçxujkweçxa çam kadenaju tudçxa karcelte txaahnitx yuu. ³⁷Vxite' kwet wãatatahçxa ikhnitx yuu. Maaí yu' pxãhsu pẽçnitx yuu. Vxite' iiméh seena' wala kxũusu'jni yuutx. Vxite' kçxilxuh ikhnitx yuu, naapkaçxha' vxite' ahçççxa neeuni yat ji'phmeetx pekũhnaçxáa ũsu', kĩhwa ji'phmeeçxa piisxáa kha'tx kapla kha'tx txã'wẽsaçxá's pã'çxçxa, nxuste pkxuunitx fxi'zena ũsu'. ³⁸Txã'wẽ pkxuunisawe'sxa' nasa u'pnimée kiwesuçxáatx fxi'zena ũsu' yu'khsu, kiwe kafxsu. (Nasa txã'wẽ Dxus yakh zhiçxkwe fxi'zesa yakha' naa kiwe' ũsweçxte yuuwa meena.) ³⁹Dxusa' pu'çxhina sũhwa'ja's ũuste ew jiiçxa txãawe'sx jxukaysa txã'wẽ seena' yũuni yuuçxawa, Dxus ũsya' neeyũuk txãa yu'sa' txagaçxhí yu' jxpa'gameeta', ⁴⁰txãa pa'gatey Dxusa' thaakwe ewsané' ji'phu' açxh naa ensu kwe'sx jii yã'jçxa. Aça' txãawe'sxa' kwe'sx yakh ja'daçxah jxpa'gawa'jsaçxatx txagaçxhí yu' jxpa'gamée.

Jesukristo yuuçxá's yajkxna fxi'zega

12 ¹Dxusa' pu'çxhina sũhwa'ja's ũuste yaakxsawe'sx nakwe wala kuh ũsta' aça' kwe'sxa' txãawe'sx ksxavxyte ũstha'w. Txãa pa'ga pkal kaypubal'jwa'jsa's nvxihtna, kĩhwa Dxus yakh fxi'zewal'ja's suwwal'ja's yu'sa' jxuka nvxihtçxa, makwe thëytewa Dxus yakh yuuçxáa fxi'zega, uu entepkaçx. ²Jesukristo yuuçxá's pu'vxitumée yajkxna fxi'zega, txãa pa'gatey txãa yuuçxáak Dxusa' pu'çxhina sũhwa'ja's ũsu', sa' txãa yuuçxáak Dxusna yaakxni jxuka kxtey yuuna pa'phkaçx pu'çxhi'. Txã'wẽ yũuya'k Jesusa' thaamewa'j yu'sa' yajkxmée kluuste uu, txakwe wala nxusnxustewa. Txãa pa'gatey pxthaa yuuni en skhẽwniijũ' wët weçxana ũswal'ja's jiik yu', txãasak cielute Dxus ũsni pukate kaçx.

³Jesusa' nakwe wala pxthaa yuuk pkalsawe'sx kusete txā'sna i'kwe'sxa' yajkxçxa txāa na'wēy nxuswa'lj en pa'thewa Dxus tasxu txutemée mfxi'zewe. ⁴I'kwe'sxa' pkala's nvxihtçxa Dxus yakh fxi'zepa'ga iiméh seena' nxusnxus uuwa'lj yu'sa' ji'phumey i'kwe. ⁵Sa' txakwe dud yu' peçxkanawa'ljmeena Dxusa' txajx luuçxtxi's na'wēk yu'kxpeje' txā'sna:

Dxus yu'kxpehna kastigāyni's açenu, adx nçxi'k,
Sa' juuna' we'wete', nxusna üsçxanu.

⁶Txāa pa'gatey Dxusa' txajx peeygāanisatxi's yu'kxpeje'k ew fxi'zekahn, Sa' txajx luuçx yuutxi's jxukaysatxku kastigāi' ji'k Dxus libru'te'.

⁷I'kwe'sxa' kastigāyni's mwantaīwe, txāa pa'gatey Dxusa' i'kwe'sxtxi' txajx luuçx na'wēk jxpe'je'. Miiyajkxwe: ¿Maa luuçxçxá' ney yu'kxpehna kastigāynimeesa üstxmanx? ⁸Dxusa' txajx luuçx yuutxi's jxukaysatxku yu'kxpehna kastigāi', nawa i'kwe'sxa' yu'kxpehna kastigāynimeesa yuuçxa', txajx luuçxmée vxitesate luuççxa txā'wē yuune'kwe. ⁹Kwe'sx le'çxuēyte', naa kiwete kwe'sx tata yu'kxpehte', kxtey nwēese'je'tha'w na' açxha' wejx thaakwe ew nwēese'jwa'lj ji'ptha'w kwe'sx Tata cielutewe'sxa's. Txā'wē nwēese'jçxa', pçumée itxi fxi'zewa'ja's ji'phu'nja'w. ¹⁰Naa kiwete kwe'sx tatawe'sxa' txāawe'sx üuste ma'wēne' wejx ew üusuthe' yu'kxpehna jxpe'ljwa'ja's txā'wēytxi yūuna jxpe'je', naa kiwete txaçxmée fxi'zewa'ja'sçxáawa. Nawa Dxusa' kwe'sxtxi iiméh wala selpiwa'ja's kaapiya'ljak yu'kxpeje', txāawa ma'wē pkal ji'phmeena txā'wēy yuukahn. ¹¹Åçxh kastigāy ína yu' wala yuh akata', txāa pa'gatha'w jxpa'gaya' wa'lu'. Nawa txāa kastigo's jxpa'gaçxa ew fxi'zeya' piyate', wala yuh ewsa', jxpubamée weçxanak ya'fxi'ze' naa pa'ga.

Dxus we'weni's weeçxya'mée mpa'yajkxwe

¹²Txāa pa'ga wa'lmée çxhāçxha miiyajkxwe, ewmeete fxi'zena üsçxawa txāajü mkaasehwe. ¹³Txā'wē yūuçxa', dxi'lj ewsaju peena yu' jxpubameene'kwe.

¹⁴Jxukaysa yakh ew fxi'zewa'jçxá's pa'pçxuna meswe, pkalte fxi'zemée. Txā'wē pkalte fxi'zeçxa', kim yuhwa Dxusa's uyya' ājameena. ¹⁵Dxus peeygāhçxa nwe'wenijüyā'ja', wala mpa'yajkxwe. Txā'wē jxpa'yajkxçxa yuuçxáa i'kwe'sx maa yuhwa txā'wē vxitesatx kaypuba'ljna ewmée yūusa yuumeene'kwe. ¹⁶Txā'wēme', maaíi yu' ptammeesa kazx pkal yūuna fxi'zesa wáa yuune'kwe kíhwa ewsa's weeçxna ahçena. Miiyajkxwe Esaua' txā'wēk ewsa's weeçxsa yuu, teeçx ü' plaatu pa'gaçxáa peekx wēt fxi'zewa'ja's txweyku. ¹⁷I'kwe'sxa' peekx jiine'kwe Esaua' txā'wē yūuni e'su' ney bediciona's ki' jxpa'ga wēek, nawa üsnimeek yuu. Aça' wala nxusna ü'nek, nawa txajx txweyni's ma'wē yūuçxa yuhwa ki' kaasxwedu'ljni yuume'.

¹⁸Israelwe'sxa' Sinaí thā'lj vxiçte utxaatx kxte' ipx yuuçxáak seena' behna üsu', sa' seena' yuh wala üukhüukh çxhi'dxna üsu'k kpi'sx we'weni

na'wē susna. ¹⁹Sa' korneta susni vxite' txāawe'sxtxi jxkaahna we'weni's wala ūukhçxa jwee yu' we'we kaahmeeta'. ²⁰Txāa jxkaahni' na'wēk yu': Maawa naa thā'the teeçx çxidaçxáawa txajana txā'sa' kwet wāatatahçxa meeçxawa we'thu yājaçxa ikhwal'j yuuna, kīh tajkx ma'k yuu nawa jī'k. ²¹Seena' yuh ūukhūukhsaçxáa vxyaana ūsu'k, txajíçxáak Moises yuhwa na'jī: Ūukhnite yayanaçxáa ūsthu jī'k.

²²Nawa i'kwe'sxa' txā'wēsateçxáamée thaakwe seena'sa tasxte utxasáa i'kwe: Teeçx thā'j Sion yaasesate Dxus ítxisa ūsnite, cielute Jerusalen çxhabte, angeleswe'sx iiméh seena' kuhsa pkhaakheçxa Dxusa's tuuthe'jsawe'sx tasxte, ²³Dxus luuçx cielutewe'sx tasxte, Dxus nwe'wenisawe'sx tasxte, Dxus seena' juuna' jxukaysatx jxkaahsa tasxte, ²⁴Dxus u'se puutx we'weçxa nvxiitni's kxtey kxū'ju'jwa'jsa Jesus tasxte, Abel ee na'wēsamée Jesus ee pkawnisa' thaakwe ewsate txā'wēsa tasxte utxasáa i'kwe.

²⁵Txāa pa'ga wala mpa'yajkxwe, kwe'sxtxi we'wesa cielujuwe'sxa's weeçxya'mée. Miiyajkxwe, Dxus jxkaahna we'weni Sina'jūwe'sxçxá's weeçxçxawa iyumeeta', aça' kwe'sxa' wejx iyuya' ajame'nja'w, cielujū yuu we'weni's nwēese'jya' wa'lçxa'. ²⁶Dxus Sina'í thā'j vxíçte we'weni' naa kiwe's kēese'kh. Nawa açxha' txā'wēçxáamée na'jī'k: Ki' peena thaakwe kēese'je'nja nawa kiweçxá'smée, petx cielu yā'lçxa kēese'je'nja jī'k. ²⁷Isa ew jiyute yu', ki' peena thaakwe kēese'je'nja jīçxa', Dxus vxitnisa ēsesa yu' jxuka ūsxitxna, aça' ēsesaméeçxáa neeyūutxna jīçxane' txā'jī'. ²⁸Nawa Dxus tasxte kwe'sx ūswa'j yu' kēese'jnimée yuuna. Txāa pa'ga Dxusa's weçxana neewe'wega, txajx dxi'pte ew yuuçxáa yūuna. ²⁹Txā'wēme', kwe'sx Dxusa' jxuka ivxiituwa'jsa' ipx na'wēsa.

Dxusa's na'wē weçxana fxi'zewa'ja'

13 ¹Teeçxsa na'wēçxah puutx peeygāhna fxi'zewa'ja's peçxkananuwe. ²I'kwe'sx yat-su pa'lsatx weçxana mpa'gawe. Txā'wē yūusa' maafia' angeleswe'sx yuhtxwa jiyunimeete jxpa'ga'ta.

³Preesu ūssatx peeygāhna mfxi'zewe, i'kwe'sx yuu preesu ūssa na'wē yajkxna. Pkxuuni fxi'zesatxwa peeygāhna mfxi'zewe, kwe'sxwa kakwe jī'ptha'w na' naa kiwete txā'wēy pkxuuni yuuwa'jsatha'w sūhna miiyajkxwe.

⁴Kabaçxa fxi'zeni' wala yuh ewsá, txāa pa'ga kabamey yu' pkal yūunuwe. Sa' kabayā'lçxa', vxitesa yakh pkal yūuna fxi'zewa'jme'. Txā'wēme', Dxusa' kastigaīna txā'wē pkal yūusatxi'.

⁵Vxyuçxá's yajkxna fxi'zewa'jme'. Ma'wēkuē jī'phuni yakhçxáawa wēt mfxi'zewe, txāa pa'gatey Dxus we'weçxa': Bagaçxte yuhwa i'kwe'sxçxáa yuutxi'sa' nvxihtme'nja jī'k. ⁶Txāa pa'ga txāa yuuçxá's pi'kiga, kxtey pasyujuna sūhna na'jīna:

Dxusa' kīhtewa jxuka txāa yuuçxáak pu'çxhi',

Txãa pa'ga weh yuhwa ũukhme'nja naa kiwete nasa ewmée
yũusatxi'.

⁷Dxus yuwe pta'sxsa i'kwe'sxtxi jxpe'jsatx miijajkxwe: Txãawe'sx
ma'wẽ ne'ta Dxusa's yajkxna fxi'ze txã'wẽy mfxi'zewe.

⁸Jesukristo' bagaçxte yuhwa yu'pthehsame!. Nyafxiwa ma'wẽsaga
yu', sa' ãçxwa txãaiçxá', sa' bagaçxtewa txãaiçxáa nes yuuwa'jsa'.

⁹Txãa pa'ga i'kwe'sxa' fxiy kaapiya'jni's nwẽese'jna fxi'zenuwe,
wejxwa Dxus peeygãaniçxá's ũuste jxpa'gaçxa çxhãçxha fxi'zeni ewsa',
açã' ũ'nisu jxkaahnisa' bagaçxte yuhwa selpiwa'jsame' txã'wẽsatx
nwẽese'jsawe'sxtxi's.

¹⁰I'kwe'sxa' ew miijajkxwe altal ji'ptha'w txã'sa'. Txãa altaltewe'sxa's
ũ'we'çmeeta' kxtee selpisaawe'sxa'. ¹¹Pkalsawe'sx ju'gu we'we pu'çxsa
judiu' tajkx ikhnisa eea's Dxus yuuçxáa ũsni jñitek txajxa' jxũna u'ljwe'
jxukaysa pkaltxi peltunãyni yuukahn, nawa takx kakwe yuutxi'sa' txajũ
jxũna u'ljçxa ekajutx kabu'. ¹²Jesuswa txã'wẽyku çxhab ekaju kasehçxa
uuna ũsu', txajx eeju nasaa pkaltxi' jxuka peltunãyya'. ¹³Txãa pa'ga
kwe'sxwa Dxusna neewe'wena ũsni yat nyafxiwe'sxa's nvxihtçxa,
Jesus yakh fxi'zeya' kasejega, txãawa ma'wẽga pxthaa yuu txã'wẽy
yaaçeni yuuya'. ¹⁴Kwe'sxa' nyafxi ũsni yata's nvxihtçxa, çxhab bagaçxte
yuhwa pçuwa'jsamée ũsna txã'sna pakwena ũstha'w, naa kiwete'
bagaçxte yuhwa pçuwa'jsamée çxhab ji'phmeetha'w naa pa'ga. ¹⁵Txãa
pa'ga Dxusa's tuuthe'jna nes yuuwa'j ji'ptha'w Jesukristo's pi'kxçxa
bagaçxtewa. Dxusa's weçxana tajkx ikhçxa kabupkaçxte, kwe'sx ũusuh
jxuka yajkxçxa txajx yase's kxsusna weçxana nes yuuwa'j ji'ptha'w.
¹⁶Txã'wẽ yũusa' kĩhçxáawa i'kwe'sx ji'phuni's vxitesatx jxtxuhdena
fxi'zewal'ja's peçxkananuwe, txãa pa'gatey txã'wẽ yũuni'sku Dxusa'
weçxá'.

¹⁷Sa' i'kwe'sxtxi kaapiya'jna jxpe'jsatxi's kxtey yuuna mwẽese'ljwe, txãa
pa'gatey txãawe'sxa' i'kwe'sx ũustxi vxituwe'sxte thegsata'. Txãawe'sxa'
cielute Dxus tasxte utxaaçxa pta'sxwa'j ji'phta', txãasatx txã'wẽ yũ'.
Açã' txãawe'sx mjĩini's weeçxsa na'wẽ yuunuwe, ewçxáa yũuwa'ja's
mpa'pçxuwe. Txã'wẽ yũumeete', txãawe'sx mjĩini' i'kwe'sxtxi's kĩhte
yuhwa selpiimeena.

¹⁸Kĩhtewa ewçxáa fxi'ze wẽeçxa bagaçxte yuhwa pkalte yu'
fxi'zesameetha'w, naa pa'ga kwe'sx pa'gate Dxus yakh mpuutxwe'wewe.
¹⁹I'kwe'sxtxi's Dxus yakh puutx we'we jxpi'ki'th, kxah Dxusa' adxa's
txaçxmeyna ki' kaasxwedul'juna i'kwe'sx yakh ũsya'.

Yuwe weçxaa kaahni

²⁰Jesukristo' iiméh ew txajx nasatx jxpe'jsa yu'k, txajx eek txã'wẽ
u'se puutx we'weni bagaçxte yuhwa yu'pthehwal'jme's vxitçxa nvxiitni's
kxtey kxũ'ju'jwa'jsa yuu. ²¹Sa' Jesukristo uutewa ki' itxi vxit-sa Dxusa'

i'kwe'sxtxi's kīhte yuhwa peejxmée ewçxáa kaafxi'ze'jena, txajx jxthāasni's kxtey yuukahn. Sa' txā' i'kwe'sxtxi ma'wē yuuweçxtewa kxtey yuuna, Jesukristo pu'çxte txajx dxi'pte ew yūusa yu's. Jesukristo yuuçxáa багаçxtewa jxtuhthesa yuuna.

²² Yakhthē'jwe'sxtxi neewe'we'th, wa'lmée jxpa'gakahn maz yuwe jxu'jmeeukuē yu'kxpehna fxi'jni's. ²³ Sa' pta'sxiçthi kwe'sx yakhthē'j Timoteo' karceluh txhweteni yā'j ūsa', sa' dud wáa pa'jana, aça' pe'jçxa yuwe'nja i'kwe'sxtxi puutx uyya' yuhçxa'.

²⁴ Dxuus yatte i'kwe'sxtxi jxpe'jsawe'sxtxi' jxukaysatx yuwe meen weçxawe, sa' Dxus yakh fxi'zesawe'sxtxiwa txā'wēy. Italiajūwe'sxwa yuwe weçxaa kaja'tx.

²⁵ I'kwe'sx jxukaysatx Dxusa' pu'çxna nes yuuna.